

碣

石

編

四明張氏約園開雕

序

吾鄉楊伯翼先生生當隆慶萬曆間傲骨嶙峋不可一世抱經樓藏有西清閣詩草四卷展轉而流入於北平圖書館壽鏞既鈔得之猶未刊也今刊其碣石編劉子威不輕許人者獨於伯翼詩則稱其廣肆奧微洞通情境五七言古規蘇李而馳建安七子時極其致律絕則約裁聲韻以激越音節是其嚴於格而峻於命篇者今讀伯翼復子威書自言治詩文二十年茲見其難蓋競競守古尺寸不敢黍米溢也書中不滿王李及明卿而

碣石編序

一四明叢書  
約圖刊本

獨推重子威引爲知己則其學可知已居城南小築曰翛園自謂守先人遺業檉楓柏栗隱映若碧城天風海

濤生几席閒菱菰荷芰蹲鴟薯蕷之屬至死不饑

見答天台

林存陽書其襟懷又復何如斯編賦一詩五十九爲卷上記

二傳一序一書六疏一爲卷下凡二卷錄於徐興公書目或有言碣石未如西清之雋永或言西清少遜碣石之沈淨屠田叔以爲兩集各具韻頌之韻洵爲知言伯翼每謂是是非非賢賢黜不肖古今儒者大權斷斷不可枉誠心直躬高行闊步毀譽無所護曲直無所強

見答

朱叔仁書名滿京師所交盡名士而卒與時忤嗚呼如伯翼者疆陽之氣鬱而不化其不遇於世也宜哉爰刻斯編爲之三歎民國二十五年一月後學張壽鏞序

鄞縣志本傳

楊承鯤字伯翼父美益

甬上耆舊傳

嘉靖二十六年進士

嘉靖

志歷官提學御史

四明談助

貴州布政使左參議

貴州通志

大理

丞

曹志

太僕少卿承鯤少有異質嗜書尤喜讀班馬二史

工於詩年十五六爲諸生沈明臣一見奇之曰今日建

五丈旗當以楊生居吾前所謂獬兒難與爭鋒也因贈

詩呼爲德祖以是有重名爲人守古獨行於當世少所

許者

舊傳

每謂是是非非賢賢黜不肖古今儒者大權斷

斷不可枉

承鯤與朱叔仁書

嘗以年家子謁尙書王世貞世貞

石編

四明叢書

見其行卷絕驚異承鯤默然別去

舊傳

語人曰

生博大心慈客持片楮求譽輒津津不休卽孺儒賈豎

人人謂王先生知己也其知己多矣僕尙庸廁其間哉

承鯤與劉子威書

既以太學生北上作薊門行一日名滿京師

旋卽歸里於城南小築曰倚園日獻詠其中與友人書

云家有遺業一區檉楓柏栗隱映若碧城風濤生几席

間菱菰荷芰蹲鴟薯蕷之屬至死不飢伏臘之暇想足

老矣其高致若此文章高妙少善書法蕭疏似晉人所

交遊盡名士第一流

舊傳

承鯤論文謂先民有作穀率

存焉不入彀率雖工無當也論詩厭薄王李謂暗中摸  
索知爲今人之詩惟誦之不類今人而不蹈古人之跡  
斯善矣譬之學書然方其心摹手追必盡肖古人及其  
成也不必盡肖乃成家可稱知言者也靜志居詩話年四十  
卒蔣傳○案本陵碣石編序云吾友楊伯翼謝世三載  
乃辛卯孟冬十二日夜夢寄三十六於予曰承鯤無  
恙近居甌洛山中見黑黃二鷓鴣弟置弋已得一黑矣  
黃未獲也題封宛然覺而賦詩曰夢裏開緘淚欲潸驚  
回梁月似君顏三年書札悲今昔一夕精靈託往還卻  
恨帝京爲下吏不知甌洛在何山鳧鷖鷓鴣終難辨  
蝴蝶周栩栩問據是伯翼之  
卒當在萬曆十七年己丑

碣石編序

故友楊伯翼者傲骨嶽崎不可一世高標磊落難與千秋式當隆慶萬曆之交蚤悟四始六義之旨逮其在日揮塵履舄紛紜莫不願聞衛玠之談道泊乎亡後遺篇歲月遒邁悉皆賞譽劉勰之雕龍論其年雖止四旬微其業可垂不朽慨其雄心無著巷慟回車之哭壯志未酬筆拈告墓之文閒詠前代五君謂顏延之允稱大手醉吟近世七子謂楊德祖可呼小兒人徒羨其擅風雅而裁吟詠乃不知其噉心肝而示牢騷也往予嘗選西

碣石編序

一四明叢書  
約園刊本

清集中數十篇授之剗劂而序其詩者略云備矣今再序碣石編焉思之不休故言之不已亦從其子德遷之微也向客有言碣石未如西清之雋永有言西清少遜碣石之沈淨予皆不然之蓋兩集各傳色澤之葩各具頽頹之韻客之所言未是通方矣且也伯翼之詩律中金石伯翼之書筆矯虯龍故誦其詩者如聆大韶并啖袁家之果得其書者如獲片甲兼收甲帳之藏伯翼可謂不死矣予偶檢敝籠載伯翼亡後夢中寄余尺牘因作紀夢詩亦蘭茝臭合不以消馨而有閒也并錄於此

序曰吾友楊伯翼謝世三載乃辛卯孟冬十二日夜夢  
寄三十字於余曰承觚無恙近居甌洛山中見黑黃二  
鷗鷺弟設置弋已得其一黑矣黃未獲也題封宛然字  
字淒楚覺而惆悵不勝人琴之感賦詩曰夢裏開槭淚  
欲濟驚回梁月似君顏三年書札悲今昔一夕精靈託  
往還卻恨帝京爲下吏不知甌洛在何山鷗鷺鷺鷺終  
難辨蝴蝶莊周栩栩閒錄罷更加淒楚念先友之無從  
見也遂成小言時予七十有六去伯翼仙逝之歲凡二  
十九年而序始成萬曆丁巳孟夏望日友弟曆本峻撰

碣石編序

二四明叢書  
約園刊本



碣石編卷上

明鄭 楊承鯤伯翼著

賦

菊賦 與董伯念膳部作

夫何有此華菊兮際暄曖之杪商庶彙寂而告殞兮淒  
氣切肅而變霜鷗雞晨鳴而極悲兮蟋蟀哀而入房俯  
厥民之幾隕兮愁萎翳之彷徨誠獨遭此摧稿兮不以  
後時而不芳紆蓊葉之葳蕤兮韡茂華之煌煌矯風露  
之高節兮薦幽遐之渥香鍾淑氣之純和兮備五色之

碣石編卷上

一四明叢書

約園刊本

中央冒隆烈而久處兮媿嫵媚之獨藏步逡巡而自理  
兮似委蛇於周行又扶疏而含寂兮若隱思而凝望藉  
荃郁而幽敷兮夫固飮真而懼彰淹貴賤而靡盛衰兮  
豈行員而德方量六服之可補兮悲三閭之見將斯宜  
喬而或谷兮將函牛而濫觴何所邁之不辰兮當萎靡  
而振揚彼瓊枝與瑤華兮又謂余之量傷時俗之弛  
陀兮誰知予之貞良淒真僞之莫辨兮惋甘苦之疇明  
縱於芑之見尋兮實約沍而愈昌直高義之不毀兮肆  
獨立其何殃雖重蒙乎瘵瘁兮終抱節而自傷使遑性

而可改兮曾奚以異乎祥桑願獨奏此薄技兮抗雲霧  
而翱翔亂日時之駛矣不我留兮軋泐沓晦道阻脩兮  
世無良人情曷適兮與蘭爲友桂爲仇兮樸菽穢累誰  
爲謀兮含貞佩潔增離憂兮

詩

贈錢季梁進士省覲歸壽其太夫人八十

高皇手提三尺劍坐麾四海如委翎凌煙功成賜鐵券  
詔謂宇內求真形錢王古鐵漁人得紫鏞徧蝕波濤甍  
熟看帶礪隱玄玉金書細鏤魚龍青二百年來治平久

碣石編卷上

四明叢書  
約園刊本

錢氏子孫多壯丁君今蔚起觀滄溟器精再鍾羅剎靈  
豐眉脩幹照冰雪玄言五千合典刑遂令天下望筆跡  
一語出口如真經時來歛與風雲會手掣紫電開青萍  
名成進士拂衣出要與吾道爭震霆太行白雲常在眼  
東下扁舟不可轉手持瑤草身綵衣直向階前學嬌蹇  
高堂老慈念笑着錦帔素髮顏如丹捧檄始知毛義喜  
牽輿絕勝潘岳歡牛心龍炙百拜獻寶幢獸鑪開壽宴  
羊酒爭馳里門入左右共識賓朋羨男兒得意豈有窮  
有官不用三千鍾但願子貴母長健承顏數上金花封

錢氏忠孝古有語吁嗟盛事今再逢吁嗟盛事君再逢  
得不盡孝兼盡忠

錢季梁山樓宴集

花逕層層轉岑樓宛宛登江吞百谷盡風壓萬波增土  
酒甘於蜜山梨冷勝冰海門餘雪在斜日玉虹蒸

送萬揮使督運之京

少年戎馬望長安萬里清霜照鐵冠九世漕艫臣節苦  
屢朝綸命主恩寬吳雲漠漠旌旗遠朔雪蕭蕭棗戟寒  
聖代只今優轉餉到京先見六師歡

碣石編卷一

三四明叢書

約園刊本

絕句二首

江鳥黑如漆澄波飛每遲鏡魚未肯下但恐世人知  
樓雉千尋峻山梁百石橫寒藤與荒蘚日日老孤城

舟中獨酌成詩

萬牛鬻爲豕不如一豚蹄金罍對綺席未若臨迴溪魯  
酒清且冽尖魚斫成鸞一酌壺再傾海日忽已西春風  
不相饒吹我顏色淒男兒重弧矢豈得念織鞋但醉莫  
復歎故山雲外低

屠田未奉常以詩寄其子太學悲不堪讀作此示

太學亦致老大之感

客裏題書寄阿戎墨花猶染淚痕紅一官天上頭俱白  
五畝城隅望轉空紫塞總無南去雁黃塵時有北來風  
寒鐙半壁春星薄笑我尊前似若翁

古城

黃河春水漸縱橫千里荒涼到古城幾處謳歌三限苦  
百年饑饉一時并寒沙莽莽英雄國宿草離離戰伐盟  
欲採風謠獻天子不知身隔白瑤京

滋陽道中詠烏

喝石編卷上

四四明叢書

約園刊本

信宿滋陽道聯巢見乳烏卑飛常狎主覓食競將雛老  
去一枝穩吞歸千種呼異時驅父子不復歎羈孤

曲阜謁周公廟

荒城落照掩嶙峋野廟長楊人路塵禮樂正逢周監占  
丹青猶見魯宮春苔埋蟲蠹豐碑折雨洗鷺鴦碧尾新  
千載金滕空涕淚不知珪璧爲何人

登聊城樓

聊城春欲暮客病乃思家載酒郡樓晚憑欄歸望賒東  
藩初壓柳南國久飛花一箭功誰在風吹萬井沙

楊花二首

春風欲度大隄長，無奈楊花竟日狂。  
吹入玉河先作雪，積來銀榜忽成霜。  
輕雷舞燕頻回首，故拂啼鶯更斷腸。  
惟有深宮看不盡，卻穿簾幕重飛揚。

其二

舞榭歌臺處處飛，隨風又上美人衣。  
翻從碧瓦疑朝霰，卻向朱簾亂夕暉。  
日暖宮牆愁不起，月明江樹望全稀。  
長安大道吹俱徧，更逐清塵滿玉扉。

清源道中喜雨

碣石編

卷上

五四明叢書

約園刊本

舟楫津梁隘城陰，雨乍飛未能滋土脈。  
稍可濯春暉，燕舞高俱盡。鳩鳴喜不歸，三年齊魯旱。  
似有麥苗肥。

憶事三首

千尺迴廊百尺橋，海天風細夜蕭蕭。  
朱簾不卷銀屏閉，明月樓臺在赤霄。  
何處吹簫夜色涼，不勝哀怨濕衣裳。  
平湖百丈天如水，露滴藕花秋夢長。

翡翠簾櫳白玉宮，碧雲無影佛鎧紅。  
夜深下界行人絕，一片經聲在半空。

至邸贈田未太常

帝里逢迎五載過，一官猶自寄婆娑。  
二三兄弟如君少，京洛風塵較我多。  
入座雲巒侵几席，到門車馬避煙蘿。  
西山爽氣朝來甚，柰爾卿卿黛色何。

寄蔡子行

久病天涯客思歸，海國心黃金炊桂盡。  
白髮與秋深，旅夢驚殘夜鄉書望好音。  
飢荒兼盜賊，萬里共霑襟。

寄聞仲連

何限悲秋意，臨軒望所思。  
年饑鄰里散，道遠歲時睽。  
有

石齋

約園刊本

念都依佛無緣欲，度誰江干小茅屋。  
憶得綠蘿垂

曉

落落大星動，荒荒殘月新。  
馬驕常倦夜，雞小不知晨。  
風雨思家數，陰陽紀異頻。  
江南與江北，哀疏幾回真。

六月十二日得上林家兄書云鬢髮中白覽之流

涕賦此寄上林兼呈袁公教讀

臥病長安客家書，此日來卻傳雙鬢。  
白總爲片心灰樹老陰，難密蟬秋語。  
易哀百年兄弟淚，頻爲故人催。

聞蟬同王辰玉作

何處蟬聲至悠然客思驚  
漠南千古望秋色不堪名繁  
暑濕難歇涼風吹易生  
莫將兒女淚輕灑鳳凰城

歸

白酒他鄉客清江故國心  
如何學山海猶自望高深  
幽薊秋常早乾坤歲屢侵  
南歸問行李吳寇幾消沈

贈王思延都護

讀書十年無一字雷雨荒山走魑魅  
垂老不知行路難  
翻向衡門紀災異眼中五嶽分秋毫  
筆底風霜半顛顛  
竭來燕市三日遊擊筑涕下常幽憂  
城雲不動凍日白

碣石編卷上

七四明叢書

約開刊本

對酒忽憶梁園秋信陵門下賓客盡  
魏王池臺煙樹愁  
信陽王君鷹揚濟眾中與我情常密  
肯將肝膽向時人  
不惜皮毛見膠漆高牙大齋手自取  
翠羽金膏漫相失  
長安大道霜日晴赤驃蹀躞黃金纓  
每攜斗酒慰寒谷  
并問生涯憐杜蘅四郊逡巡馬常備  
百函矢口書還成  
慷慨相逢又相別百年草草何愁絕  
壯士空存越石心  
老妻但笑張儀舌歸去天南憶舊遊  
茅堂晝掩青谿雪  
開元寺宴集留別王思延余懋吳

九月燕山雪涼風早下來客心殊自苦  
歸思不堪裁鐘

鼓秋城急煙霜夕殿開南行寄鄉信欲去更徘徊

題何仁仲采芳園是其尊君司寇公所老

芳洲迢遞接城隈雪壁朱扉水國開大別寒雲生几席  
岳陽秋色傍樓臺朝廷舊識尚書履丘壑猶傳太傅杯  
我亦爲園滄海曲碧霞千里望蓬萊

曉望

鳳城涼月落雙闕早鴉鳴日氣千門赤霜華萬壘清欲  
歸寒事逼將老壯心驚樂劇留餘蹟蒼茫意未平

安我素大行席上留別

碣石編

卷上

八四明叢書

約園刊本

綠髮看易老黃華羞獨存朝廷事既邈丘壑道彌尊歸  
去將湖雁愁來共嶺猿天涯候霜雪谷口念田園密篠  
通江界寒潮滿郭門題詩紀歲月得酒信乾坤失意無  
南北忘形有弟昆離筵對明燭黯黯自消魂

九月九日郭美命太史席上作

節有重陽勝情因落帽雄鷹驚塞門黑日薄海天紅酒  
拓賢人量詩聞大國風平生懷有道萬里幸相同

九月十日王胤昌太史置酒丁園集社中諸君分

得山字



失意逢高會，因人破旅顏。  
綠蘿幽徑入，朱館夕陽還。  
命酒占雄帥，分題鬪小蠻。  
坐深銀燭冷，夜久玉繩閒。  
踏蹬千金骨，遲迴萬馬閒。  
霜清黑谷水，秋滿白楊關。  
過眼黃花會，驚心黑髮斑。  
還將太史副，歸老共名山。

雪夜集林孟鳴比部宅得秋字

朔風吹積雪，莽莽見邊秋。  
寒益敝貂苦，歸逢長鋏愁。  
出關瞻紫氣，把酒問滄洲。  
毛骨生難換，乾坤老自休。  
新知有比部，感激漫消憂。

薊門行贈張伯誨將軍

碣石編卷上

九十四明叢書

約園刊本

薊門三日風，日黃驚塵漲。  
天歸路長禁，柳條寒半欲折。  
邊榆葉稀天欲霜，將軍角弓控不發。  
櫪上鳴鑣動，咆哮玉帳高。  
塞瀚海雲朱旗半掩，孤城月城頭落月照。  
皇都萬竈漠漠秋煙孤，暮天軍中一事無。  
蹴踘笑踏紅氍毹，繡簾銀燭夜慘淡。  
仰視河漢西南趨，乳皮薤白金城酥。  
滿堂醉客爭樽拈，將軍大呼一擲萬袒臂。  
已覺無全胡天子，但顧西南隅。  
窮荒蕭條八月雪，鳴雁哀叫胡雛呼。  
雲中古戍烽候緊，漁陽勁卒膽氣粗。  
天山茫茫白草枯，文皇遺鐵生紫翠。  
至今羣胡不敢動，側目齧指空驚吁。

英雄出塞薄萬里龜茲子闕入版圖君不聞北斗之下  
爲中國太宗滅蠻心未休翠華卻過北斗北千秋仰見  
肇造難萬古長沙淚鑿臆

寄別馮琢庵太史

歸去清江理釣絲一舟長與白雲期荒山露下蒼厓濕  
茅屋秋生碧薜滋直以形骸甘落魄肯將顏色怨明時  
黃金臺上休回首莽莽風吹易水悲

索居

萬里燕山客涼風久索居如何聞去雁只是少來魚欲

碣石編卷上

十四明叢書

約園刊本

雪關雲白將寒禁柳疏壯心與衰草落日對躊躇

王思延席上留別分體五言

悠悠滄波客鬱鬱朔風離別有嚴期況乃聞歸鴻辭  
決豈不烈感歎夫何窮燕市多繁霜遊子怨飛蓬在子  
惜分手顧我中心同清歌發逸響麗月臨寒空絲桐感  
人情哀思滿堂中高義古所敦君子戒薄終努力念嘉  
會萬里望飛熊

思延尙無子故望之

閩雁

何處聞歸雁寥寥半碧空江邊有楓樹不待曉霜紅

七哀詩四首

驅車廣陽城遙望黃金臺朝暉生巨野霜氣正皚皚悲  
風號衰柳飢鳥鳴相哀遊子戒明發念舊心何悲行役  
不及餐結轡中自違白駒在空谷幽人臨路歧娥眉世  
所妬忠信常見欺去去惜年歲弗爲達人嗤

其二

朝發桑乾河暮宿樓桑村王氣久消落靈蹟祕陳根物  
色遞遷化日月屢崩奔奈何此征夫跋涉無朝昏驅車  
冒榛徑忍飢過市門餘雪照墟里頽陽藹荒村隴墳鬱

碣石編卷上

十四明叢書  
初刊本

相望賢達無一存顧彼翳桑人太息涕潸潸

其三

客行無昏曉乘月理歸軒仰視明河低畢昴正闌干繁  
霜生肌骨齒戰不能言空野無人聲雞犬互悲喧羸馬  
爲哀鳴僕夫自辛酸行行日已老帝鄉日已昏朔風裂  
緇衣客歸苦不早燕雀懷故栖遊魚思在藻日月逝不  
處誰能長美好眷我平生親言旋永相保

其四

遲遲遠遊子鬱鬱望故鄉故鄉何脩阻江海浩相望旱

疫癘爲厲天災橫流行時濟彌阡陌妖祲化秋陽赤土  
生黃埃魚鼈入中堂饑瘼困無訴疾疫薦爲殃愛子棄  
不收幼妻鬻爲糧流屍滿江河暴骨如朝霜顧聞號慟  
聲摧痛割中腸與子同幹軀各在天一方安得宋公粟  
竭力與助勤

重過寶應湖

湖水寒初落行人老漸悲土風臆雁熟鄉思稻粱遲業  
起千秋見名空四海知輕帆日西夕吾道欲何之

送蔡尙兼先生總憲貴竹

碣石編卷上

十二四明叢書

約畧刊本

露白江水寒葭葉半折北風吹空帆渺若雲際雪自  
公借寇今五年萬里獨向羅施天朱軒白馬出江滸千  
乘萬騎爭祖筵霜清柳絲尙堪結急管哀箏半嗚咽青  
衿弟子涕不收白頭父翁惜難別嗟公之來海水澄河  
魚大上年屢登文翁笑看蜀俗化次公坐籌漢戶增此  
日還爲貴陽客輶車更指盤江窄一綫高懸鳥道青千  
尋下見蠻煙白洞獠谿苗相簇迎箐嵐沙靄濕飛旌中  
原日落天地赤北斗倒視銀河平官衙無事雲氣生石  
鼠竹雞清晝鳴夷歌土酒直一醉絕域那知長官貴門

開吏散霜葉飛十日不見一客至  
鳳凰城裏騎如雲寂  
寞天南消息聞題書好寄桐鄉叟  
還憶當時老使君

湖干曝日

關外柳條長平湖半夕陽雪消沙草綠  
春動水煙黃老  
漸思三壑貧猶典驢驢理生無遠計  
曝背近東牆

寄題江心寺

勝絕江心寺江空塔影長潮痕剝斷石  
海氣濕危廊僧  
老秋無寐雕寒翅有霜英雄餘涕泗  
風雨弔殘陽是文丞相起兵處

碣石編卷上

十三四明叢書

約園刊本

喜朗初歸

秋老黃冠谷歸來已薄霜水田晴稔稔  
巖屋曉蒼蒼鯨  
海書難寄龍秋興不忘名區可遺死  
慎莫問行囊

脩園晚望

林窗暝色下天海方超忽野水靜生煙  
羣峯澹將沒歸  
人草閒至怪鳥丘中發萬慮寂無言  
還山事金骨

寄慧上人山居

密巖冰雪晴水石入天清古寺晚鐘出  
山家春霧生蒼  
畦烏撒飯新雨綠苔藁若共桓溪老  
應知不世情

加餐

江浦秋潮大郊窗野望寬沙鷗終日白海樹幾回丹篋  
篋計常溫邊隅天漸寒鄰人念多病相勸且加餐

讀慧上人東嘉草二首

新詩讀罷意俱閒煙海蒼茫去不還應笑桓溪老居士  
碧窗終日夢青山

夢落青山百徧登綠溪黃葉路層層霜潭欲下無行跡  
手拄寒崖幾尺藤

雪林和尚東退居

碣石編卷上

十四四明叢書

約園刊本

搖落湖南寺煙波古法堂寒收石瀨淺天入海門長老  
樹占風雨幽苔稔雪霜我來時宴坐心與大雲涼

寄仲連園居

南國暄光到江潭已泮冰雪晴寒翠近沙暖濕雲蒸多  
病身何補繁憂夢不勝荒園三徑竹生事在傳燈

雪曉懷西清田舍二首

松暗泉鳴澗道崩澗門秋色掩寒藤朝來茆屋無行路  
雪壓幽厓第幾層

種來黃獨已如拳手劓冰膚煮澗泉酒醒雪晴無一事

竹窗炊火送新煙

送豐吉甫之京兼訊田未太常田未吉甫舅

委頓中林士今年作遠行死心別妻子生意憶磨麿白  
草經秋折青天出塞平太常消息斷宅相幾時成

雨赴東山草堂

極知山雨至不憚嶺雲深一徑穿蘿入千峯並馬尋濤  
聲海市黑石色佛堂陰沽酒候童僕哀猿何處吟

雪夜仲連孺愿長文看菊因懷東山茅舍

不了悲秋望其如卒歲何海風陰作雪湖雨夜增波懷

碣石編

卷上

五十四明叢書

約園刊本

舊心俱折看花恨已多荒山老茅屋飢餓幾人過

西閣雨望

閣外松閒盡夕陽碧窗清喜自焚香柴門不掩寒潭綠  
遙見西山雨足長

碣石編卷上

碣石編卷下

明鄭 楊承胤伯翼著

記

北征記

萬曆戊子春余有事於北丁未戒舟西二十五里至霸  
上雨霏霏幕江千里一望令人有擊楫意戊申抵上虞  
大雪道有僵殍寒甚遂止宿城西己酉雪深尺餘迤邐  
至曹江雪轉劇不可渡庚戌雪霽沙水如鐵遂渡辛亥  
至山陰會陳立甫司理亭午見峴千巖萬壑照耀璀璨

碣石編 卷下

一四 明叢書  
約園刊本

真應接不暇山會故沃土而近數歲侵行旅稍暮卽戒  
不進睹一郡天下可知矣壬子渡錢塘平沙積雪海門  
諸山如銀屋渺渺天際癸丑復雪甲寅會錢季梁進士  
飲其山樓樓據鳳山麓宋孟后宮址也江流如帶宛宛  
繞欄楯而南而於越千峯如翠虬青鳳湧出几席間極  
不忍別乙卯復雪飄瞥甚隆烈彌劇日與逆旅主人  
呼酒擁爐而已湖山眉黛了不可見丙辰雨丁巳會虞  
德園鴛部戊午雨三日雪不消簷間冰柱如鬚髯己  
未復雨雨雪陰曠久會城米價大踊闔闔間有食糠粃



者糠與米價幾敵蓋丁亥之水互蘇松嘉湖杭紹數百  
里漂沒廬舍人畜不可勝紀田有至三四種竟不得穫  
者以故亡竄相屬父鬻子夫鬻妻諸山壤民日不得再  
食薄暮卽就寢鐙火爲絕庚申雨止辛酉晴輿出關  
壬戌至崇德癸亥宿平望原隰蕭條村人多以木屑雜  
糠食而野林及祠墓閒往往有自經者甲子宿吳江乙  
丑至吳門丙寅同陸給舍倪太學陸參軍陸山人遊虎  
丘丁卯陸給舍復攜具至虎丘近暮抵山涼月乍流松  
濤欲發徘徊磴道閒與浩穰之區若隔世虎丘爲吳闔  
閭墓盤郢魚腹之劍三千在焉靈蹟永閉空爲遊人資  
賞耳而王珣復捨宅爲寺珣名不甚著而以捨寺故爲  
世美談名固有所附以傳耶戊辰發吳門己巳至無錫  
以舟急不得一登惠山悵望久之晚宿常州庚午至丹  
陽晚至鎮江辛未約陸山人遊金山汲中冷泉登裴公  
洞江天閣時風起濤涌南北帆檣出沒鴻濤中倏忽萬  
里而石骨出寺東南不數百丈奇峭如琢相傳爲郭公  
墓不必其然午飯僧觀瀾房欲乘興至焦山風轉厲遂  
還至渡口尋昭關昭關者子胥亡楚奔吳所越闕也辨

潯雄濤烏覩所謂百金劔蘆中人哉壬申喜生講筵遊  
北固徒步從濱武場抵山麓坡陀閒男婦多劇野草間  
之云御飢耳憮然而去登麓有一小祠則前守所建以  
識狼石也狼石爲諸葛武侯與吳大帝據坐畫策拒魏  
武處夫一水一石經前修遊止後必識之卽憊漫不可  
蹤跡又傳會之而爲之亭臺碑碣以永其事何者則慕  
其人耳而其人之言行功烈炳朗竹帛乃窮白頭不一  
開卷得其厓略不亦倒置哉折而東下磴道數級復上  
爲嶺脊廣不踰一尋長數百尺下臨峻坂前屬甘露寺  
山門由脩廊而上折而南爲大殿殿東爲鐵浮屠高二  
丈餘唐李德裕建山杪有望海亭圯矣所謂摩雲頂也  
俯視郡城諸山蜿蜒繞坎方大江夾而趨鐵觀不虛也  
癸酉渡揚子甲戌抵維揚乙亥尋瓊花觀觀昉漢延祐  
閒花歷晉唐宋俱無恙紹興閒女直移之北羽流補以  
八仙花今亦亡矣唯空石欄耳丙子發維揚宿邵伯湖  
丁丑至高郵晚至界首湖勢相屬空洞不見水端居人  
多茅茨矮屋莽莽蒼蒼風起塵合無復江南面孔矣戊  
寅至寶應晚至淮陽觀漂母祠想淮陰垂釣處未嘗不

扼腕歎雄俊之士當其窮也屠狗吹簫何可比數及其  
得尺寸之柄則天飛雷動天下響屬之矣悲乎哉士窮  
也雖然世不有真英雄乎朝而殺人暮而禪寂朝而田  
畷暮而三公漠然淵然中奚動哉己卯宿清江浦庚辰  
出閘時江南運舟俱出淮淮多淤舟楫不行篙師驟沒  
入水進權萬口謳歌面作紫黑色此可以知漕輓之難  
矣嗟夫以河之大千七百川之水聚焉而復合以中國  
諸名川悉委於河而僅以一淮疏之上流壅則下決下  
流壅則上潰而顧曰隄且塞焉豈萬世計乎辛巳至清

碣石編卷下

四四明叢書

一初園刊本

河雪寒舟子蹉跎壬午至三汉口守風癸未宿古城登  
陸寓望荒落甚問有盜否曰盜多顧無用此爲甲申至  
宿遷城卑而迫河乙酉宿鋤頭灣丙戌至邳州留侯所  
進履地也稍見一山如黛出天末心目爲開夕會袁坤  
儀進士投一詩甚婉麗丁亥至新安驛戊子至房村己  
丑至徐自淮至徐河兩厓俱束以鉅隄故潘尙書所築  
以捍河暴者庚寅觀戲馬臺九里山直空阜耳英雄陳  
迹與寒煙蔓草蕪沒低回者久之徐南北孔道而有司  
經費歲不貲民疲於役吏置於輸以故凋瘵甚當事占

雖頗憂之然稍一裁革則不勝騰口矣辛卯宿茶城河  
至此折而入爲古洪閘汶水初由耿山下趨而南嘉靖  
閒淤改濬今道然屢濬屢淤歲費無算丁亥復淤北歸  
運舟以千計積不行彌月食盡大噪夫文皇帝遏汶水  
分注南北爲漕計也當事者卽漕不經心經心者何也  
壬辰宿鏡山山趾故有湖今廢癸巳宿夏鎮甲午至宋  
家口乙未發南陽是齊地稍見瓦屋丙申至新店聞水  
薄舟楫不行與諸子醲飯飮登陸小酌作柳茶少噉快  
甚願見榆皮葉俱盡問之知爲饑人所餐慘然而罷丁

碭石編 卷下

五四明叢書

約園刊本

西上新聞戊戌至石佛盜劫運舟殺一人傷一人己亥  
至趙村道多餓人告饑爲作粥食之庚子至濟寧辛丑  
舟不行壬寅約諸子謁闕里無應者遂獨身從濟東門  
買蹇驢二從一蒼頭行三十里至孫氏鋪餉午又東行  
三十里至兗州城西門時尙未晡遂尋少陵故城南樓  
經魯王宮宮無前殿東爲嶷陽王宮又東爲嶷陽王別  
墅而窆故城南址在焉高數仞周一畝許而立石題曰  
杜甫臺蓋公父閑爲兗司馬公省覲登嶽雲樓作趨庭  
詩是也泗水流其下泗水入城東門極清泚西合於汶

迫日暮返旅邸濁醪三舉就寢癸卯從充東門渡金口  
堰循泗水行二十里忽見灌木深黑望若城雉從者曰  
孔林矣疾行十里至曲阜城西門循城西折而北行列  
柏中二里許一綽楔顏曰至聖林又數百步至漸門漸  
門者林前門依魯故北城址高三丈餘入門不數武旁  
立一石題曰輦道宋真宗幸闕里所由也又數十武折  
而西爲洙水橋洙水從東北來西合於濟踰橋又百武  
爲享殿左右爲齋房出殿爲子貢手植楷楷圍丈餘高  
三四丈枯矣肅行數十武折而西三丈餘南面爲夫子

碣石編

卷下

六四明叢書

約園刊本

墓高丈餘石碣題云壹世祖前石鼎爲至治閒物肅禮  
而還墓西丈餘爲子貢築室處墓東三丈餘爲伯魚墓  
碣曰二世祖禮如夫子墓又東爲駐蹕亭亦宋真宗事  
墓南數丈隧道西爲子思墓碣曰三世祖禮如伯魚墓  
石鼎爲延祐閒物隧道左右列石人二石獸四形質奇  
詭人或云方相獸或云神羊駁馬迫日午東西行林中  
不數百步林木茂密仰不見白日饒大阜無碑版莫知  
其誰何也而孔氏子姓多葬焉出林登漸門樓望魯故  
城城形方周三十里十二門而漸門據城北址史記孔

子卒葬魯城北泗上其然哉甲辰登曲阜謁周公廟觀  
大中祥符間二碑剝落不可讀矣曲阜起關中委蛇出  
沒千餘里貫魯城東入海而廟據其上或云卽魯太廟  
址南望兩觀東望少昊金天氏陵顏子墓平楚際天而  
龜蒙晁繹諸山如障繞出東南寒翠欲滴下阜觀車輞  
井入城謁宣廟出殿南十餘武爲杏壇金党懷英所書  
覆以小亭又南爲宣聖及七十二賢贊碑石半剝貞祐  
閒火也又南爲夫子手植檜大不餘丈長三丈餘而黝  
黑如鐵色無枝葉又南稍西爲奎文閣左右刻漢唐諸

碑石編 卷下

七四明叢書

約園刊本

碑碑之最古者漢五鳳元年魏陳思王二碑會日暮不  
能徧觀觀金絲堂從毓粹門出觀顏子陋巷魯靈光殿  
址址空無人居夕宿管句任君所任東阿人有致甲辰  
別任君暮宿兗城西不寐仰視屋梁竊怪兗地夷曠而  
田最賤畝有至百錢者彼其所入薄也故嘗論之以爲  
分田之制不可復矣江都限田之法必不可不行也井  
田之制不可復矣因其地之高下沃瘠多鑿陂池溝洫  
使旱有所備而澇有所泄必不可不行也或曰兗故高  
曠其土宜豆麥而民復使之奚必水耕火種如江南哉

余曰不然人未有不樂沃饒而水與土未有不相狎者  
彼隆慶丁卯戊辰窅大水平地丈餘壞城郭廬舍何故  
則水至無所泄也萬曆丁亥窅不雨者彌歲迄戊子春  
尙枯暎穀價翔踊餓殍薦屬草木之實略盡又何故則  
水盡無所潴也行百餘里內稍見一二窪深不數尺卽  
薄有水矣故青窅閒田多下下者無厚收也所以無厚  
收者彌望赤土人力無所用惟仰面冀天耳人固難慮  
始哉乙巳旦西行八十里至南望湖水半落沙草閒男  
婦以萬計掘鳧茨蒲蠹之屬風大發荒荒不辨渡水謁

碣石編 卷下

八四明叢書

約園刊本

宋尙書禮祠一食頃而大舟至矣登舟倦甚舟人爲作  
雞黍白酒一醉竟夕丙午至開河丁未至安山戊申發  
東阿晚至張秋己酉至東昌登光岳樓樓高百餘尺四  
望極目然久不雨春盡猶寥寥耳庚戌至臨清大雨竟  
日遠近霑喜辛亥至武城一綽楔題曰絃歌古渡壬子  
至鄭家口會董太史癸丑宿四女樹甲寅至德州午過  
東光乙卯至滄州州設轉運司晚至獨流丙辰至楊青  
晚至直沽人家俱瓦屋水清駛曠望倦眼爲蘇丁巳至  
楊村驛晚至蔡村戊午至河西務從陸晚抵灣嶺接代

寺已未旦發午入都門暮抵館

重修延慶寺記

天台之教幾息而法智大師以苦行起大中祥符間一時名臣總持就而諮詢至感動人主爲賜號拓院舍而延慶之名始著於天下迄今爲年者五百七十有七僧之爲代者一百二十有一而寺之重建者一修者再萬曆戊寅任持德高復圖新之而適故相文敏余公以祭酒予告歸首爲疏倡其事無何公召入而公之子廷槐遂適成之越乙酉畢役壯偉宏麗燿然新矣而高等復

碣石編 卷下

九 四明叢書

約園刊本

乞鯤爲之記夫有瑰奇之士踈蹕之才崛起尺籍之中而自致壤墟之外操一曲之說以易方內而天下靡然趨之若飄風之馳疾雨之解辟草萊創堂奧使千古之下信其說而不疑抑何恢恢有餘力哉雖其術有大小學有精粗自非絕異之資不能三代而降若黃老楊墨刑名莊列管商孫吳及今佛氏是已眾家之說傳於世或壽與否古人師之黃老刑名其效最著東京而下佛之說最大其言宏肆其理奧衍其指浩渺而無端倪其書極博不可載紀精其說者謂足以出六合潤三光無



論其事有無當其創爲微辭馳騫一世使天下靡然趨之固非淺見寡聞能通其趣也是故無形之中有形之表積之而稊米又積之而河山又積之而方維圖則必有恢詭譎怪之事出焉而猥以尋常耳目測之陋矣故忠佞並產也芝棗並茁也麟鳳梟獍並生也而後乃知天地之大也日月之明也河海之潤丘岳之崇也況乎佛之爲教其精微幾與儒者埒第有善不善耳嘗竊怪夫今之爲儒者與之論佛莫不訾之然而莫不事之而又莫不悖之彼其高視闊步侈焉而談千古之蹟窮百

家之說一何辨哉徐而叩其詣爲儒爲墨爲老爲佛爲刑名爲管商又何恍忽無見哉顧且以其貪生弔詭之心溢而之於佛當春而思木落盛夏而悲凝霜於是乎不勝其死生利害之念膠於中而委質於佛而不敢後矻矻墨墨高者圖出世卑者冀來生可謂至矣而獲其行事則抵冒自恣熾趨而行以醜相扼以詐相傾內競鈇利外表枯寂以退爲進以取爲與進如息陰退如墜谷肥德聚淫睚眦詆詭股人之膏而豐其肉臨勢不避湯火財之所交則天地四方昧目此夫沈五欲海而操

菩提行者也何謂儒哉無論儒卽法智師學佛者也其勤至於四十九年脇不沾席而教觀之義竟以舉則真無愧其類者今之爲儒而無愧於吾夫子之道者誰而又何譏譏辭而闕人爲也故楊墨黃老刑名管商莊列孫吳佛斯皆分造化殊尤之氣而創爲未有以發天地之藏易塗民耳目其用皆有裨於儒惟陽竊夫儒之名而陰逃而之乎佛顯之乎佛而又私悖其戒也者斯儒與佛之所不赦也佛何傷於世哉由此觀之寺雖新可也

傳

李名父傳

李君生香鄞人也字名父生而秀慧讀書數過輒不忘及長美須髯望之有異而顧獨善默憶與同舍生學不見其問辨而意固已了了初頗好繪事諸劇伎已忽盡屏去篤意經業年十六補邑弟子員爲華亭公所知未幾以貲入國學試高等南海倫公甚器之於是天下知名父矣君大父春亭公性峻急畜諸子姓不少假獨假君君故善治產家內外事咸決於君咄嗟便辦無不中

其歿春亭公益才之父橘莊公治產米鹽遂病肺每疾作竟夕不休君亦竟夕不解帶其事橘莊公常得其微指先中之歲時具滫瀡致洗腆必邀其諸父奉觴上壽歡如也橘莊公常召日者卜日者私於君曰天運一周公大期至矣名父大憂之爲不食而每以丙夜出中庭蕪蒼籲天祈以身代沍寒薄之遂得痼疾明年橘莊公卒哀毀骨立又明年母孺人卒名父哭不絕幾滅性疾增劇意惘惘不欲生家有圃亭常懸其父母像朝夕薦茗述家政如平生歎月朔必至墓所哭拜墓去城十里

碣石編卷下

十二四明叢書

約園刊本

而近常徒步往初爲期後不爲期忽一念至輒往矣家人弗知也比歸見餘淚覆面乃知從墓所還如是者十餘年不輟其天性篤孝如此與仲氏析箸不爲籍遇美田宅輒不問人有左袒君謂君云云君默不應徐而曰天地何私乎君性儉嗇於自奉服食器具一如素儒而顧獨好施人有求之必與之有貸之者未嘗責子錢曰無損於我而有利於彼何靳焉郡嘗饑富室多閉不發而名父獨開庾以待糴亦稍周其匱者閭里德之邑土鹵俗無積蓄利頗闕出海外與島夷互市又多負夷金

夷怒掠殺數輩於是府禁不得下海通夷且懸賞格捕  
下海者於是邏卒口致漁樵入市賞府悉酷坐之君憫  
之亟白於府全活甚眾君性夷與人交無城府亦不爲  
苟容引體峻議論口完名節而性不能忍人過而忠厚  
闔爽無彼此於人人亦以此近之

論曰名父常豎道傍曾井三圮三葺之此其意有足多  
者語云種樹畜養不見其大有時而用吾於名父亦云  
其子若孫彬彬蓋賢矣

序

碣石編 卷下

十三 四明叢書

約園刊本

建安七子序

世無建安七子集范司馬彙七子集而冠以孔融宗典  
論也非建安七子案陳壽志敘陳思而下至於公幹七  
人而謝靈運作鄴中集詩亦列仲宣等七子從史也是  
爲建安七子七子賦頌誄贊書論表檄俱雄歷一代而  
詩爲最詩俱能入漢堂廡而子建爲最嗟夫以子建之  
才魏武私之幾奪嫡矣顧潰焉自放上觸嚴禁下快見  
讎德祖旣誅儀虞踵戮削爵徙封殆無虛歲則才爲之  
殃也子桓作典論而不及厥弟至修儀輩稍涉甚怨亦

黜不錄嘻妬哉六子翩翩各以所長掩蔚千古若仲宣  
西京德邁朝雁公幹永日斯皆風雅之羽儀陳思之流  
亞乎餘子篇什絕少慕古者恨之惟偉長著論庶幾成  
一家言此不錄錄其詞賦雜述示諸同好傳之無窮

書

答天台林存陽書

虎林一再奉顏色旋復別去庭葉撼撼七隕矣自四明  
望天台相距一雲耳會面之難乃至此屈子痛心於生  
離文通銷魂於遠別叔夜命駕於一思士衡興哀於十

碣石編卷下

十四四明叢書

約園刊本

載古今人情豈相遠哉而僕橫淹蕭艾坐失椒蘭索居  
有過矣之嗟抗首增懷哉之歎以此憤懣忽忽涉世如  
遊塵壒中晦不見白日安覩所謂大覺乃辨其大夢哉  
城南有先人遺業一區檉楓栢栗隱映若碧城天風海  
濤生儿席閒菱蕪荷芰蹲鴟薯蕷之屬至死不飢伏臘  
之暇想足老矣足下擁赤城之標飲虹梁之沫其奇麗  
視僕直玄澗之與洿池耳然當其自適亦復如是使旋  
附訊履祉天下事未可知山中人且復強飯無用憂天  
爲也尊傳尙未搦管病懷日夕作惡莫可寄念耳如何

復劉子威先生書

昨歲辱手教并示大集感愧彌至尊體比當勝良慰僕  
治詩文二十年今茲見其難耳蓋兢兢守古尺寸不敢  
黍米溢也至拙集付梓所謂妄自尊大使出於涯涘不  
望洋向若歎耶然以之求王司寇一敘有餘地矣所以  
見王司寇無一語及敘者司寇爲人博大心慈喜獎借  
下輩客有持片楮求王先生譽言先生輒口津津稱善  
不休以故世無愚不自靡不至王先生門者先生小言  
大章百牘俱發靡不當其人意卽孺儒賈豎無不人人

陽百編 卷下

十五 四明叢書

約園刊本

謂王先生知己也夫王先生知己多矣僕尙庸廁其閒  
哉其論歷下忠篤有餘朗鑒不足歷下執筆張甚其文  
不至左馬不已其詩不至漢魏諸公李杜不已而固自  
以爲咀左馬之英獵漢魏之骨矣明計直指居之不疑  
而王先生又從旁傳之以益其過蓋歷下樂府十不得  
三七言古十不得四五言古十不得五其最近者五七  
言律七言絕耳而歷下所最極力則七言律世亦以此  
慕之然謂其同軌先哲可詠可歎其然乎王先生敘致  
最暢能盡其才惟五言古餘體工拙半其文極變幻精

彩流動足成一家言而好用綺語此歷下所絕無者歷  
下文務深沈不敢一步夫巨明子長軌躡亦不敢一語  
襲六代以還口吻而殊未洽其洽者古人匡郭其否者  
詭道耳君房極口論文獨服膺先生與僕書曰我國家  
文如子威詩如足下有幾人哉先生亦謂僕曰明卿諸  
君附王李而起蠻夷大長老耳足下打天下手也思之  
愧汗二先生愛僕許與過當有之敢自誣哉乃其守古  
獨行斷斷不至望人顏色逐人行徑則自謂庶幾不爲  
知己剝面皮者也承教不敢不正對極知非後生體死  
罪死罪鯤再頓首

碣石編卷下

十六四明叢書

約圖刊本

答永嘉劉忠甫書

僕則安能詩哉要其守古尺度滿不敢溢卑者必有當  
於先民自謂不啻銖寸過之也北地信陽持蒼素不相  
下一時識鑿之士不無左右袒然篤而論之信陽爲偏  
夫舍筏登岸期在得岸不在執筏岸不必登雖有寶筏  
終筏中人非彼岸也詩之爲道至圓不能加規至方不  
能加矩則方圓之至也規矩在手必至於是乃爲方圓  
李何文章在矣李有不自出偉詞者乎何以言古人影

予也何有不盡一先哲者乎何以言自開堂奧也蓋先民穀率備至不入其穀卽富窮萬卷敏發百兩侈則侈矣何謂詩哉匪徒穀也藉令二三作者爲唐人口吻而不稟沈韻於心快乎韻猶若此何論尺度今海內一二大老爲聲詩曷嘗不轟轟盛哉顧暗中索摸之知其爲今人詩耳使讀之而不謂爲今人而無所蹈乎古人斯善之善也足下體絕異之資詞翰之雅南州少雙不啻爲兜整吐氣故是大戰場人願必無以東南一壁自霸僕且執牛耳而先矣

碣石編卷下

十七四明叢書

一約園刊本

### 與錢季梁書

讀足下癸未制文知爲神仙中人數年來甚欲圖一面不虞忽見辱也美秀疏宕如其文文可以知人不虛矣僕涉此道不深無能起足下意顧以爲古今詩文自有眞骨黃口執筆字剽句墊百綴成篇遂抗手高引謂前無古人此不以溺自照耳夫文猶書也臨池染翰無不師古人方其精心畢力必盡肖乃已及其成也必盡不肖乃成家故書之爲道無一筆不出古人而無一筆似古人無一筆蹈古人而閱之眞爲古人也斯書之妙也



文亦猶是矣李于鱗作古樂府謂如胡寬造新豐雞犬  
放之皆識其處其論精矣僕嘗駁之竄作新豐其材木  
雕績墜漆瓦石戶牖衢道無不新也而無不舊也斯真  
巧矣如毀其礎柱移其屋壁遷其戶牖瓦石道路墜漆  
之屬而爲之而曰巧何爲巧哉于鱗作樂府則移其礎  
柱屋壁戶牖材木墜漆而爲之者也不可謂不巧不可  
謂真巧夫文亦猶是矣足下試憑之外小詩一軸奉寄  
殊不足采悚悚

答朱叔仁書

碣石編卷下

十一四明叢書

約園刊本

吳門得手教讀之流汗乃不知僕之不宜於今如此夫  
不宜於今而生於今生之者謬耶反古獨是不能宜於  
今者謬耶傳不云乎羽翼未成不可以高飛僕翅短矣  
何寥廓之望哉憤世絕俗何益於時狐突王陵吾之師  
也王季孺常極口怨僕太直僕不敢解雖然謂王愛僕  
則可謂王知僕則不可大抵僕所操指無他異於世以  
爲人一生耳生有重於九鼎有輕於鴻毛非天之降才  
異也彼其所自爲生者異耳僕無纖芥之善而有必不  
可化之性謂是是非非賢賢黜不肖古今儒者大權斷

斷不可枉誠心直躬高行闊步毀譽無所護曲直無所強二三兄弟一時把臂論交若出一口私心最喜謂庶幾直道可興而不虞世方以苟且爲明哲波靡爲流通無所是非爲大雅執廉隅守尺寸爲含瓦礫不亦謬乎持方鑿納圓柄既不相入矣而一二猿狖之士深用爲嫉白眼少年不堪其行者又橫加口語肆爲構陷昔阮嗣宗縱情獨詣禮法之士疾之如讎足下試察今之疾僕者何如人哉丈夫黑白自非不識一丁其胸中未必不了了陳留有風俗卽小吏可知矣錢孔中人定不至

碣石編卷下

九四明叢書

約園刊本

與之爭萬里途而顧猶不能不爲足下一開口所謂目光在牛背上耳疆陽之氣鬱而不化人我鬪正自難破如此歎之歎之夫僕不早自省謂往哲懿行褻裳濡足可至勃然與蹶然輟年過三十而道愈喪交遊徧四海而名日湮語云四五十而無聞謂聞道也譽云乎哉身不行道不行於妻子僕畜妻子十許年空名耳彼下軍大夫龐德公王霸諸子所謂肅肅雍雍僕有哉非也而欲以口中雌黃軒輊一國君子恥之閨門之內可以觀德何暇責世乎來諭敢不自戢獨恐進退無據老死

而一無所成爲知己憂耳正月出門四月始抵都行路亦太難矣七八月閒念足下亦當北來思晤方切不一

一  
答金華李允達書

念與足下赫蹏薦返忽十餘歲歲事蹉跎老冉冉至矣而猶爲天地一蠹灑焉自異怒焉傷心雖南北故人時時在念而老困一經無由望見顏面僕山水之癖宇內所知比年以來卽浙中諸名山川往往入夢亦不能一杖履徧之咨春北遊燕趙魯齊之郊弔少昊之墓登千

石編卷下

二十四月  
約園刊本

金之臺謁孔林孟廟而太山咫尺扼不得一登至今以爲大恨離寒觸暑百許日始至都至三日而病病百日始解薄了試事踉蹌而南抵家復病病復百許日稍安穀顧迄今不了牀箦債如之何忽承翰教數年之懷縷縷欲盡讀之不知流涕之汎瀾也足下懷海上之日久台蕩之念當復不淺亦有意石窗赤城閒乎則僕有五石槩藏之舊矣願以待足下爲十日飲願足下鵠首東也

疏

正有道人募緣疏

正有者婁江人號大量列泉上人弟子也列泉以行業高天下而正有爲之執薪曰之役甚堅苦列泉善之亦如獺獠之於五祖云久之別其師遊太末靈曜寺三年復之橋李崇明各數年晝則施茶夜則誦經况不輟又造大千手眼觀音善才龍女送落迦供禮而每歲二月必乞米以百餘石絕海徧齋大眾蓋七返矣海上黃頭赤髭靡不識大量道人者嗚呼篤哉歲戊子復謁普陀還持一卷候余脩園而延慶龔上人爲之介籛除而入

碣石編 卷下

三十四明叢書  
約園刊本

貌古氣閒既歷敘其所爲苦行而欲乞余一言以北遊燕趙齊魯之墟廣甸萬眾普惠十方要使善信傾心知識委志破慳貪門登歡喜地接濟迷津澄瀛覺海斯其志亦偉矣夫儒之所惡吝爲大佛之所罪慳爲先故有施食施金捨身捨宅門徑雖殊因牙不異若夫西蜀錢山東京金穴高安之四十鉅萬穰侯之千有餘車石衛尉錦障蠟薪王元寶朱泥銀壁斯皆煙消灰滅雨散颺揚冷入青蕪塵生黃壤金棺已化蚌母俱飛玉樹空埋錢神安在豈若勞施苦厄力拯疲癯割籽粒之藏弘濟

萬品損須彌之積普飮羣生目之所擊耳之所聆或顛  
頷遠道或鬱腊窮林或半菽不敷或一簪不著或公輪  
私負罔遁斯屠或夏濕冬皸不掩骹骼或千里流離攜  
負項屬或百口天闕枕藉魂銷茲皆痛折心脾荼淪髓  
骨佛寶所以起大慈悲龍天所以發大誓願千聖爲之  
蹙頰十地以之興嗟況乎叢爾凡夫須搖微命倏隨湛  
露旋化朝陽總屬微塵同歸大劫而欲以貪視骨幹嗇  
視繚緡不以極難得之人身早辦最上乘之善果祇恐  
懸車遂迫窳堵橫侵一縷輕絲微風吹而忽斷九層危  
卵寤眼瞬之輒傾伏願若善信若智識速發菩提心或  
造寺或寫經廣登龍華會億萬隨緣錙銖合慶義無掠  
美福有所歸者

碣石編

卷下

三四明叢書

約園刊本

四明叢書

四明叢書  
約園刊本